

इवनिंग डोगरी न्यूज़ बुलेटिन

समे-18:15 Hrs

<><><><><><>

Headlines

- 1 प्रधानमंत्री ते बीजेपी दे वरिष्ठ नेता नरेंद्र मोदी होरें कश्मीर च होए दे रिकार्ड त्रोड़ मतदान गी लोकतंत्र दा इक नमां मानक करार दित्ता ऐ।
- 2 डीजीपी आर.आर स्वैन, ए.डी.जी.पी विजय कुमार, आनन्द जैन ते डिविजनल कमिशनर रमेश कुमार होरें पुंछ जिले च सुरक्षा हालात दा जायजा लैता।
- 3 भारतीय रेलवे कश्मीर घाटी गी रेल राहें देसै दे बाकी हिस्सें कन्नै जोड़ने दी उपलब्धि दे होर कोल पुज्जी गेई ऐ। रियासी रेलवे स्टेशन दा कम्म सबूरा होने दे कोल कश ऐ।
- 4 मौसम विभाग नै उत्तर भारत च जबरदस्त गर्मी ते लू जारी रौहने दी पेशनगोई कीती ऐ। मई म्हीने दे अखीरै तोड़ी जम्मू च पारा 44 डिग्री दे पार पुज्जने दे असार ना।

<><><><><><>

PM Modi-Kashmir

प्रधानमंत्री ते बीजेपी दे वरिष्ठ नेता नरेंद्र मोदी होरें आखेआ ऐ जे कश्मीर च बड़ा मता मतदान होआ करदा ऐ ते हुन एह लोकतंत्र दा इक नमां मानदंड बनदा जा रदा ऐ। इक प्राइवेट खबरें आले चैनल गी दित्ते गेदे इंटरव्यु च श्री मोदी होरें आखेआ जे कश्मीर च होआ रदे मतदान नै 30 शा 40 बरें दा रिकार्ड त्रोड़ी दित्ता ऐ। मैहंगाई बारै बोलदे होई मोदी होरें आखेआ जे दुनिया दे होरनें मुलखें दे मुकाबले च भारत च मैहंगाई काबू च ऐ। उनें आखेआ जे रूस ते यूक्रेन बश्कार जारी जंग सिद्धे तौर पर खाने-पीने आलिंग चीजें, ईंधन ते हेलें दिएं कीमते पर असर पा करदी ऐ। श्री मोदी होरें आखेआ जे होरनें मुलखें च करसानें गी यूरिया दी बोरी जित्थे 3 जहार रपें दी थ्होआ करदी ऐ, उत्थे गै भारत च करसानें गी एहदे लेई छड़े 300 रपें गै देने पौंदे ना।

<><><><><><>

## Poonch-DGP

पीर पंचाल खित्ते च सुरक्षा हीलें गी बल देने दे मकसद कन्नै जम्मू-कश्मीर पुलसा दे डरैक्टर जनरल आर.आर.स्वैन, ए.डी.जी.पी विजय कुमार, ए.डी.जी.पी आनंद जैन, जम्मू दे डिविजनल कमिशनर रमेश कुमार ते होरनें आला ऐहलकारें पुंछ दा दौरा लाया। उंदे इस दौरे दा मकसद पुंछ जिले च सुरक्षा हालात दा व्यापक जायजा लैना हा। इस मौके पर डीजीपी स्वैन होरें सुरक्षा कर्मिं दे जत्तें दी सराहना कीती ते उनेंगी आखेआ जे ओह सुरक्षा चुनौतिं दे मद्देनजर बरोबर सतर्कता बनाई रक्खन। डीजीपी होरें जी.ओ.सी, मकामी अधिकारिं ते सुरक्षाकर्मिं कन्नै व्यापक सलाह-सूत्तर कीता। तोआई डिविजनल कश्मिनर होरें जिले च लोकसभा चुनां लेई तैयारिं दा जायजा लैता।

<><><><><><>

## LS 7<sup>th</sup> Phase

लोकसभा चुनां दे 7में गेड़ तैहत 8 राज्यें ते केंद्र शासित प्रदेशें च पैहली जून गी मतदान होगा। इस चरण च कुल 904 मेदवार चुनां मैदान च न। चुनां आयोग मुजब पैहली जून गी 57 संसदीय हल्के लेई वोट पाए जाडन। एहदे लेई 2 ज्हार 105 नामांकन भरे गए। 954 मेदवारें दे नामांकन वैद्य पाए गए। पंजाब च इस गेड़ च 13 संसदीय हल्के च वोट पाए जाने न ते एहदे लेई सब्बनें थवां मते 598 मेदवारें नामांकन भरे। एहदे मगरा उत्तर प्रदेश दी 13 संसदीय सीटें लेई 495 नामांकन भरे गए। लोकसभा चुनां दे खीरले गेड़ च उत्तर प्रदेश ते पंजाब दी 13-13 सीटें, पच्छिम बंगाल द 9 सीटें, बिहार दी 8 सीटें, ओडिशा दी 6 सीटें, हिमाचल प्रदेश दी 4 सीटें, झारखंड दी 3 सीटें ते केंद्र शासित प्रदेश चंडीगढ़ दी इक सीट पर वोट पाए जाने न। वोटें दी गिनतरी आला कम्म 4 जून गी होगा।

<><><><><><>

## Reasi-Rail

भाती रेलवे कश्मीर घाटी गी रेल दे राहें देसै दे बाकी हिस्सें कन्नै जोड़ने दी उपलब्धि दे होर नेड़े पुज्जा करदा ऐ। रियासी रेलवे स्टेशन दा निर्माण कोंकण रेलवे कारपोरेशन लिमिटेड पाससेआ कीता जा करदा ऐ ते एह हुन मुकम्मल होने दे नेड़े पुज्जी गेआ ऐ। इस परियोजना लेई कम्म करै करदे इंजीनियर दीपक कुमार होरें आखेआ ऐ जे इस परियोजना लेई लोडचदिआं सब्बै सुरंगां किश म्हीने पैहले गै तैयार करी लैतियां गेइयां न। बारामूला थमां रामबन संगलदान तगर दा हिस्सा पैहले गै मुकम्मल करी लैता गेदा ऐ ते रियासी तगर दा बकाया रौहंदा हिस्सा बी हुन मुकम्मल होने दे कोलकाल पुज्जी गेदा ऐ ते इस रूट पर जून तगर आजमाइशी ट्रायल रन कीते जाने दी बी मेद ऐ। रियासी दे डिप्टी कमिशनर विशेष महाजन होरें इस चुनौतीपूर्ण कम्मै गी सबूरा करने बक्खी बधै करदे इंजीनियरें दी सराहना कीती। उनें आखेआ जे रियासी च चिनाब दरेया पर बनाए गेदे रेल पुल गी सैलानी थाहर दे तौर पर विकसित कीता जा करदा ऐ। उनें आखेआ।

<><><><><><>

### Ramban-Pernote

26 अप्रैल गी रामबन दी परनोट थाहर ल्हास-पस्सियां पौने दा मामला सामने आया हा, इस दौरान रामबन गूल शिड़क दा इक अशारिया 5 किलोमीटर हिस्सा खिस्किये रूडभू गेआ हा जेदे करी गूल तहसील ते गांधरी ब्लॉक दा जिला मुख्यालय कन्नै राबता वृट्टी गेआ हा। शिड़क निर्माण कंपनी नै इस शिड़क दा कम्म 7 मई गी शुरू होआ ते हुन एह चलने जोग बनी गई ऐ। रामबन दे डिप्टी कमिशनर बसीर-उल-हक चौधरी ते अडिशनल डिप्टी कमिशनर वरूणजीत सिंह चाढक ते ओ.सी ग्रेफ एस.के गौतम होरें मौके आली थाहर दा दौरा लाया। आकाशवाणी कन्नै गल्ल करदे होई रामबन दे डिप्टी कमिशनर होरें आखेआ।

<><><><><><>

### Investor-Meet

उद्योग ते बपार मैहकमे आस्सेआ जमू दे कन्वेंशन सेंटर च निवेश सरबन्धी इंवेस्टर्स मीट दा सरिस्ता कीता गेआ। इस दौरान मुख् भरै थवां तकरीबन 110 निवेशकें हिस्सा लैता। उद्योग ते बपार मैहकमे दे निदेशक अरूण मन्हास होरें कार्यक्रम दी सदारत कीती। एहदी मकसद निवेशकें गी जम्मू खित्ते च आकर्षित करना ऐ। निवेशकें बक्ख-बक्ख सत्रें च हिस्सा लैता ते अपने सुझा ते चिंता गी सांझा कीता। मन्हास होरें आखेआ जे सरकार निवेशकें

गी हर संभव सहायता देने लेई पूरी चाल्ली बचनबद्ध ऐ। उनें आखेआ जे साहड़ा मकसद जम्मू च उद्योगी इदारे कायम करना ऐ। एहदे कन्नै नां छड़ा आर्थिक विका होग, सगुआं रोजगार दे मौके बी बढडन।

<><><><><><>

## IMD-Heat Wave

भारतीय मौसम विभाग नै इस म्हीने दी 25 तरीक तोड़ी पंजाब, हरियाणा, चंडीगढ़, दिल्ली, उत्तर प्रदेश, राजस्नथान ते मध्य प्रदेश च बड़ी मती गर्मी रौहने दी भविक्खवाणी कीती ऐ। मैहकमे दा आखना ऐ जे अगले दऊं दिनें तोड़ी दक्खन पूर्वी अरब सागर दे किश हिस्सें, मालदीव कामोनि इलाके ते बंगाल दी खाड़ी दे दक्खनी हिस्सें दे कन्नोकन्नी अंडमान-निकोवार द्वीप ते अंडमान सागर च दक्खन पच्छमी मानसून लेई साजगार स्थिति बनी दी रौहगा। इस करी दक्खनी भारत च शुक्रवारें तोड़ी भारी थमां भारी बरखा बरने दे ते केरल च कल्लै तगर भारी बरखा बरने दे आसार जताए गे न ते अगले दऊं त्रऊं दिनें च तमिलनाडू, पुदुचेरी, करायकल, केरल, माहे ते कर्नाटक च मती भारी बरखा दी संभावना ऐ। मौसम विभाग नै भारत दे मध्य ते उत्तर पच्छमी इलाके च अगले किश दिनें तगर तापमान च 2-3 डिग्री सैल्यिस दा बाद्दा दर्ज होने दी शैंका जताई ऐ।

<><><><><><>

## Weatherman

मौसम विभाग नै आखेआ ऐ जे मंदरें दे शैहर जम्मू च तापमान मई म्हीने दे खीरै तोड़ी 44 डिग्री सैल्यिस कोला उप्पर जाई सकदा ऐ। पिछले किश दिनें थवां जम्मू दे तापमान च उप्परोतली बाद्दा होआ रदा ऐ जेड़ा अज्ज-कल्ल 41 सोयां 42 डिग्री दे कोलकाल चला रदा ऐ। मैहकमे नै अगले कोई इक हफते तगर बरखा बरने दे कोई आसार नेई दस्से न ते मौसम आम तौर पर खुश्क गै बने दा रौहगा। मैहकमे नै अगले कोई इक हफते तगर बरखा बरने दे कोई असार नेई दस्से न ते मौसम आम तौरा पर खुश्क रौहने दी तवक्को ऐ। औदे किश दिनें च पारा 44 डिग्री या एहदे शा बी उप्पर जाई सकदा ऐ। मौसम विभाग नै आखेआ ऐ जे औने आले दिनें च बी गर्मी थमां राहत थ्होने दी कोई मती मेद नेई ऐ ते पारा होर बी बधने दे असार न। विभाग नै इब्बी आखेआ ऐ जे 22 थमां 28 मई मझाटै मौसम आम तौरा पर खुश्क रौहग पर टामीं-आमीं थाहरें पर हौली बरखा बी करी सकदी ऐ।



## Umeed Schems Udhampur

गर्मी दे मौसम च जंगलें च अगग बड़ी तौले लग्गी जंदी ऐ। अकसर चीड़ दे पत्ते तौलें अगग फगड़ी लेंदे ना। एहू अगग ब्हा कन्नै होर बी फैली जंदी ऐ। एहदे कन्नै उत्थुं दी बन संपत्ति गी बी नुकसान पुजदा ऐ ते पर्यावरण लेई बी चुनौती पैदा हुंदी ऐ। अगग लग्गने आली घटनाएं कन्नै निबबड़ने लेई इक बेहतरीन जत्त तैहत जम्मू कश्मीर ग्रामीण आजीविका मिशन तैहत जिसी आम तौर पर उम्मीद कन्नै बी जानेआ जंदा ऐ नै नाबार्ड तैहत इक्क जत्त शुरू कीता। चनैनी ते चनैनी तहसील दे दूर दरेडे इलाकें दी 30 महिलाएं गी इनें पत्ते कन्नै चीजां बनाने दी सिखलाई दिती जा रदी ऐ। एहदे कन्नै सजाने लेई चीजां, झोले, फुल्लें गी रक्खने आस्तै गुलदस्ते ते होर दुइयां चीजां बनाने दी सिखलाई दिती जा रदी ऐ। एहदे कन्नै ओहू अपनी आजीविका बी कमाई सकदियां ना।



## Tarnah-Bridge

तरनाह पुल दा कम्म इसा म्हीने दे अखीरै तगर पूरा होई जाग। कठुआ दे डिप्टी कमीशनर राकेश मिन्हास होरें आखेआ जे लोकें गी इस पुल दे बनी जाने कन्नै राहत थ्होग। उनें आखेआ जे राश्ट्रीय जरनैली शिड़कै सरबंधी प्राधिकरण नै जिला प्रशासन दे सहयोग कन्नै अपने सारे जत्त कीते न तां जे कम्म बरसांती आले मौसम थवां पैहले-पैहले पूरा होई जाग। इस पुल गी तकरीबन इक्क बरे पैहले चान-चक्क आए दे हाड़ करी नुकसान पुज्जा हा जेदे मगरा ट्रैफिक दा रस्ता बदली दित्ता गेआ ते गड्डिएं गी लम्में रस्ते राएं औना पौंदा हा ते केई बारी जाम बी लग्गी जंदा हा। इस करी लोकें गी परेशानी बी झल्लनील पौंदी ही।



## IPL

आई.पी.एल क्रिकेट च जंदी रातीं गुजरात दे नरेंद्र मोदी स्टेडियम च खेड्डे गेदे पैहले क्वालीफायर मुकाबले च कोलकाता नाइट राइडर्स नै सनराइजर्स हैदराबाद गी 8 विकटें कन्नै हराई दित्ता। एहदे कन्नै कोलकाता नाइट राइडर्स आई.पी.एल दे फाइनल मुकाबले च अपनी थाहर पक्की करने आली पैहली टीम बनी गई ऐ। अज्ज इस्सै

मैदान च राजस्थान रायल्स दा मुकाबला रासल्स चैलेंजर्स बेंगलुरु कन्नै होग। इस मैच दी जेत्तू टीम दा मुकाबला दुए क्वालीफायर मैच च औंदे शुक्रवारें सन राइजर्स हैदराबाद कन्नै होग।

<><><><><><>